

Mbanjranz Gvaq Ngeihcib Bi Le

二十年后的家乡

Gveigangj Si Mungzgungh Cin Gujsanh Siujyoz haj (1) ban Veiz Yinfangh

贵港市蒙公镇古山小学五(1)班 韦蕴芳

Cuengqhag lo, gou ciuqciengz youq ranz raiz cozyez. Sawqmwh, miz aen doxgaiq ndeu mbin daengz baihnaj gou, gou baez yawj, gingqyienz dwg aen gihseizgan saekhenj ndeu. Aen gihseizgan gangj: “Angqcoux mwngz daeuj daejniemh gij mbanjranz gvaq ngeihcib bi haenx!” Gou siengj: Lij miz cungj saehndei neix? Gou gig geizheih, sikhaek diuq haeujbae.


Miz haujlai aencung youq baihnaj gou cienjdoengh. Sawqmwh, “ba” gou doek roengz gwnz namh.

Gou haida baez yawj, “va, ndei-yawj raixcaix, neix couh dwg gvaq ngeihcib le gij yiengh mbanjranz gou?” Gou nyaenx mbouj ndaej haenh naeuz. Gou mbouj ndaej youq gizneix lo. Doeklaeng gou daeuj daengz haenzdah.

Raemxdah sawdikdik, nyex-nyaenx baez yawj, bya sang lueg laeg. Gou youh haenh naeuz: “Va, mbanjranz gingqyienz bienqbaenz yiengh-neix, ndei-yawj raixcaix lo!”

Gou wnggai baema ranz lo. Gou ndaw sim naemj.

Gou bae youq gwnz roen, bae



gvaq aen suenmak. Gwnz gomak aenaen bizbwtbwt lumj gyoengq lwgnyez ndeigyaenz. “Mwngz ndei!” Miz boux vunzgihi gangj coh gou. Gou deng gij sing neix hwk lo. Gou nyexgyaeuj baez yawj, dwg boux vunzgihi caeuq boux goenglax henyawj suenmak. Gou byaij bae cam: “Mwngz ndei, goenglax, mwngz baenzlawz miz boux vunzgihi ne? De aeu ngaenz lai lwi?” Goenglax riu naeuz: “Vunzgihi ranzranz cungj miz,

mwngz lij cam gou aeu ngaenz lai lwi!” De youh han naeuz: “Mbouj aeu ngaenz lai, cawx boux vunzgihi mbouj aeu daengz hajcib maenz ne!” Dingq le gij vah goenglax, gou naemj: Va, mbanjranz gou gvaq ngeihcib bi baenzneix geizheih!

Gou youh byaij ha byaij, doek-laeng ma daengz ranz swheij lo.

“Yi, ranz baenzlawz youq gyang-mbwn?” Gou heuh naeuz. Daxmeh dingqny sing heuh, roengz laeuz lo,

byaij daengz dangqnaj gou naeuz: “Mwngz cungj mbouj rox ha? Seizneix ranzranz cungj yienghneix, vih ancienz, gyoengqvunz genj ranz cuengq youq gyangmbwn, mwh roengzdaeuj, mbouj yungh byaij loh, aen ruz seizhoeng rox soengq raeuz bae giz siengj bae de.” Gij vah daxmeh hawj gou doeksaet yatyat.

Haeujma ndaw ranz, engqgya cinwngz lo……

Daengz mwh gwn ngaizringz, daxmeh ndenq aen daehgau ndeu hawj gou. Gou cam daxmeh: “Vihmaz hawj gou aen daehgau ndeu, byaek ne?” Daxmeh riu naeuz: “Seizneix ha, bek aen daehgau baez ndeu couh miz byaek okdaeuj lo!” Gou bek yaep he, caen miz byaek okdaeuj dahraix.

“Biu” sing ndeu, aen gihseizgan haenx caiq baez mbin ma daengz baihnaj gou: “Daejniemh seizgan sat, cingj baema!” Gou cij mbouj ndaej mbouj ma ranz lo.

A! Gvaq ngeihcib bi le mbanjranz geijlai gyaundeih, geijlai fouqmiz, geijlai mizyinx ha.

(指导老师:覃东花)

Gij Nazhaeux Seizcou

秋天的稻田

Seizcou dwg geiqciet fungsou, caemh dwg seiz doxngeix.

Ngeixdauq gij bi' ndwen ceiq-ndei seiziq gou, cix dwg youq mbe naz neix guhcaemz, mbatmbat ngvanh daengz mbe naz neix, raemxda gou cungj rihngang-nang……

“Goeng ha! Duzma de buet roengz naz bae lo.” Gou sing hung hemq hawj daxgoeng nyi. Gaenlaeng daxgoeng cix daj ranz byaij okdaeuj, daiq gou buet bae ndaw naz……

Youq ndaw naz haenx gou aeu va' iq ma coengh duzma de cang-ndang, gaenlaeng caiq yawj daxgoeng gvej haeux. Gou caemh aeu doengh gaiq va' iq de ma guh aen gvaengzva ndeu hawj bonjfaenh, gou daep hwnj gwnz gyaen bae, daxgoeng haenh gou dwg boux lwgnyez ceiqndei daih' it, duzma hix laeng gou bi rieng, buet bae buet dauq.

Youq duenh roen ma ranz haenx, gou gwih max youq gwnz hoz daxgoeng, ndaw fwngz gaem aen maenzsaz ndeu, maenzsaz faenmingz mbouj dwg gij doxgaiq ceiq feih gwn, hoeng gou gwn feih dangqmaz, aenvih aen maenz de dwg daxgoeng saz hawj gou.

Gwn haeuxcaeuz sat, gou dawz hab le caeuq daxgoeng guhdaih bae

nazhaeux, daxgoeng naeuz miz gohaeux caet saek, dou bae ra gohaeux caet saek de. Hoeng gou baenzlawz ra cungj ra mbouj raen, rumzhaemh boq gvaq ndaw naz, couh mup daengz heiq rang gohaeux de. Daxgoeng daiq gou naengh youq gwnz rin de dak rumz yiengjsouh, onj ndei raixcaix……

Bi' ndwen yaep da couh gvaq lo, daxgoeng bae haujlai bi lo, hoeng duenh bi' ndwen neix gou baenzciuh cungj mbouj lumz, youq seiznyez gou, daxgoeng dwg boux vunz ceiq youqgaenj gou.

(Ciengj Sihyi/raiz
Veiz Munglingz/hoiz)



Mbaw Faex Vih Gijmaz Rox Bienq Hoengz?

树叶为什么会变红?

Daihgya itdingh cungj rox canghsijsei Dangzdai Du Muz hot sei 《Youz Bya》, ndawde miz song gawq riuenzi ciuh doq ciuh: “Haemh daengx ci vih ngonzo ndoeng raeu, mbawraeu hoengz gvaq va ndwengeih.” Song gawq sei neix caenlili myauzsij gij gingjsaek seizcou roengzmwi gvaq le mbawfaex bienq hoengz. Hoeng, daihgya rox mbouj rox vih gijmaz miz mbanj mbawfaex rox bienq hoengz lwi?

Laxlawz, doengh go saekheu gij mbaw de hamzmiz lai cungj ieng saek, miz ieng saekloeg, ieng saekhenj, ieng lauxbaeg hoengz, ieng doih lauxbaeg hoengz, ieng va-heu daengj. Seizcin caeuq seizhah, haujlai doenghgo caemh youq seiz fatmaj, seizneix ndaw mbawfaex

ieng saekloeg gig lai, ndigah mbaw de cungj dwg saekheuloeg. Daengz seizcou, mbwn liengz lo, ndit hix noix lo. Seizneix, mbawfaex mbouj caiq aeyungh ieng saekloeg, leuxle gij ieng saekloeg bienq noix, ieng saekhenj, ieng lauxbaeg hoengz menhmenh yienh okdaeuj, mbaw de couh bienqbaenz saekhenj. Daengz neix, cungj mbaw gofaex mbaw-hoengz ndawde majok gij doxgaiq heuhguh ieng vaheu ndeu, ndigah mbaw de bienqbaenz saekhoengz gyaundeih okdaeuj.

Seizcou liengzyauyau gaenj daengz lo, gyoengqraeuz caemh-caez bae gyang ndoeng gyangq ngonzo gij mbawfaex gyaundeih haenx ba!

(Cwnz Yenlaiz/raiz
Veiz Yen'gyangz/hoiz)